

第三集

粵雅堂叢書

第三集

粵雅堂叢書

蜀
苑
奧
論

粵雅堂叢書目

第三集

觚篲奧論二卷

宋

張方平撰

唐史論斷三卷

宋

孫甫撰

叔苴子內編六卷外編二卷

明

莊元臣撰

西洋朝貢典錄三卷

明

黃省曾撰

五代詩話十卷

國朝

王士正原編

鄭方坤刪補

芻蕘奧論卷之一

樂全先生張方平著

政體論

臣嘗讀漢書至晁錯之事惟錯謀策宏遠達於權義有
致主經世之志戮於姦讒之口而史氏不能褒發其衷
譏以變古易常之說臣竊憤厲反覆較錯凡所辨議悉
國家危事亂經將以圖安建治皆合霸王之軌不可不
正遷之謬譏嘗試論之古不可變也則是三代無革敝
救失之理而漢所用法當循亡轍也忠恭之異尙質文

之殊用禮不相襲樂不相沿固三王之罪矣用寬大革
苛慘固高祖之過矣夫以文景之世追視漢初之政沿
革旣多豈錯未當變易哉稽遷旨意則是顛而弗扶危
而弗持興亡倚天成敗推數括囊結舌浮沈容身者爲
智矣此乃夫子深鄙以爲焉用彼相可爲具臣者也故
論者稱遷是非謬於聖人斯言誠矣益使後人務苟且
而惡任事貴因循而重改作沮有心之銳爲无功之辭
其於義教不重虧歟臣嘗論之夫爲邦之道有制有權
制爲之本權爲之用節之以禮行之以信齊之以刑斷

之以義此不可易之法故爲之制長則縈之短則引之
重則損之輕則益之此不可常之理故爲之權其不可
易者不爲艱難急卒而變之其不可常者不爲安甯平
泰而慢之其本正雖危必安其勢順雖治必亂然人之
大情危必思安治必忘亂均乎二者處權爲難非通才
達義適時知變者孰能與于斯乎易曰變則通通則久
故樂而不亂復而不厭之謂道矣夫事遠必弊法久必
衰原其始初各有宜設時遷俗易迹在理非聖人執權
盍卽回革使天下之耳目常新萬務之本原必正立法

垂制不在人君乎言爲典型動爲律度苟无愆于大義甯一取乎舊章在商中宗嚴恭寅畏天命自度治民祇懼不敢荒甯在周宣王聿求賢臣憂勤戒今上御名以振絕

緒嘉靖庶邦並建中興之業夫豈悉履湯武之迹哉在漢孝武引拔俊乂文藝隆起武功震權雄材大畧爲盛漢主又豈咸踐文景之教哉且事苟便俗豈憚乎解弦而更張政苟戾時何固乎守株而求滯故夫不知達權推變之理而牽易常循舊之說者是拘生腐儒按文泥俗凝塞治道此聖智之所常患者也臣敢旁採世務僅

若小敝者列之以裨萬分焉

王政之本在信命令

臣聞制天下之動者主乎一齊天下之衆者存乎信王

言惟作命百官承式兆民從乂其難其

今上御名

惟新厥德

天下至大也兆庶至衆也民心至動也萬務至煩也統
之有宗會之有元使衆而不惑繁而不亂非言何以一
之故曰德惟一動罔不吉德二三動罔不凶天何言哉
四時行焉萬物育焉惟其信之謂也故王者居上以制
下宅中而圖大慮善以動非禮勿言動則可法法必可

以繼言則可行行必可以復賞罰政命紀律條貫惟事
事乃其有訓非信何以成之傳說曰惟口起羞教令輕
發所以召亂帝舜曰惟口出好興戎謂王者之言天下

善惡所繫也故凡爲人上自一話一言罔不戒

今上一御名

動一靜罔不寅畏又况設爲法制布于四方之大者歟

書曰

今上一御名

乃出令令出惟行弗爲反故命令者國之紀

綱政之隄防紀綱一弛則萬目隨解隄防一傾則橫流
莫制故令必信則上得其政下安其事令不信則吏侮
乎法民慢其禁弊雖微于安靜之初害必大於虞急之

際且匹庶而无信衆必棄之士而无信友必疎之卿大夫而无信家必敗王者而失信天下必危故人可以去食而无信不立三軍可以奪帥而非信不行爲人之本爲政之經信爲大也比見朝廷詔令或尋卽遷改或久而自廢吏易之而奉行不固民忽之而苟慢多違揆大體而論之此損政之深者蓋國家切于求理急於聽受一人唱之卽行一人沮之卽止本末固爲枘鑿前後自相矛盾是使民无所措手足而多犯于有司者也臣伏願自今凡諸臣有請創端釐舊事干大政必集議而後

行下于多方必一定而无變畧其毛細簡其苛蕪勿以
辨言亂舊經勿以小忠害大德無稽之言勿聽弗詢之
謀勿庸俾萬姓咸曰大哉王言又曰一哉王心自然民
協于中四方風動疇敢復慢孰不悅從嗚呼弗慮胡獲
弗爲胡成今上御名厥初圖有終惟明明后邦其永孚于休
致理之要在廣言路

臣聞趨利違害去危圖安者世之大情遺身徇時忘家
存國者人之難事故夫從容於舒逸眷戀于富貴泥乎
情之樂者舉世而是感激乎忠義顧重乎名節處乎事

之難者絕世而希哲后盛王深推此理故開懷接納勤
心率勵無言不受擇善而從奇策遠猷必加酬賞犯顏
忤意曲爲矜容愚淺者固恕之疎誕者姑置度外如鑒
之照各盡其衆形如衡之平無爽乎一物憑羣智以爲
智因衆心以爲心通其情僞分其邪正而君人之道舉
矣伊尹曰匹夫匹婦弗獲自盡人主罔與成厥功盤庚
曰無敢伏小人之攸箴此則詢于芻蕘下及庶賤者也
況於士民乎況於卿大夫乎臣聞之屋漏在上知之在
下政事有關必訪旁議詩曰惟彼二國其政不獲惟此

四國爰究爰度晉文聽輿人之誦克興霸功子產恤鄉校之謗卒成善政衆所善者我則行之衆所惡者我則改之政以無瑕事以合義是爲國者之藥石爲政者之量準也譬之庶人治一家之政其里人邑子有見其田萊不闢家事不脩則勉之以敦業厚生勸功利用之說見其羞服玩用不中禮起居出入不以時則誠之以制節謹度周身嗇用之善居常則勵之以孝悌和睦之美緩急則展之以救賑分勞之助者是必其族姻親愛意在相厚者也其有語焉不以義游焉不以時閒誘其子

弟使不循於法離謀其僕妾使不親其上是必素嘗仇
恨或挾姦伺便有所利之者也彼爲一家之長者將孰
悅焉是必說其相厚者謂有益其家也是必怨其仇而
利之者謂有損其家也今爲天下乃不然忠良而相厚
者翻以爲怨讒邪而利之者翻以爲悅是固不若庶人
之治一家能審損益之正矣嗚呼歷代之昏君暴王不
自入於道德之門者可知之矣由其臣有利之者歟歷
代之亂臣賊子不能自立於忠厚之路者可知之矣由
其主有召之者歟故君臣之誠不盡則天下之患必生

理固然矣臣竊惟陛下體乾剛之德奮震耀之斷獎拔
孤介聽納下議帝堯之詢於衆大禹之不自矜成湯之
從諫弗咈文王之徽柔懿恭道兼前王光被四表小臣
愚鄙安足以識聖德之大者然嘗覽載籍頗識理亂之
道見乎英叡之君忠正之臣口口戒今上御名咨嗟相戒莫
不以博采下言周知衆情而興治德驕佚之主姦利之
下阿諛順欲牽合迎意莫不以壅遏忠直漸取衰敝而
至危亂故深願陛下揭日月之明無出鄙而不照廣江
海之度無細流而不納稅稗不以近俗而見棄葑菲不